

ISCARTA YA' SAN JUDAS

Yicheb'anil iscarta ya' Judas

¹Hanin Judas inti'an, ischejab' Komam Jesucristo wehan, yeb' xin wuxhta hinb'ahan yeb' ya' Jacobo, chiwatojan hune' carta ti' teyet hex wuxhtaj yeb' hex wanab'. Kaw awteb'il hexxa yu Komam, yeb' kaw xahan ay hex yu Komam Dios Mame, yeb' xin kaw tanheb'il hex yu Komam Jesucristo. ²Tz'ayojab' isk'ul Komam teyinh, yaq'ab' Komam aq'ank'ulal yeb' isk'ulch'anil isk'ul teyet yinh kaw niman.

Eb'naj ch'aq'ni kuyb'anil maxhtaj yehi

³Hex wuxhtaj, hex wanab', kaw xahan ay hex wuhan. Kaw tx'i'alxa el chiwochehan chiwatojan hune' incartati'an teyet yinh tzet ye kokolb'anil xakochah tet Komam Dios. Yaj wal tinanh xin, chitit yinh wanmahan ta yilal wanitojan hune' carta ti' teyet, yu kexyiptzen yinh heyinahti heyanma heya'ilnhen hune' kuyb'anil b'ay ayko janma hanhoh yetonhxa Komam. ⁴Kaw yilal wanitojan hune' carta ti' yuto ay hunteq'an mak leq'ti'alnhe yu yok texol. Hunteq'an eb'naj tu' istx'ojalnhe chiswatx'e eb'naj; chal eb'naj ta yu ayonhxako yinh isk'ulch'anil Komam xa'isje kowatx'en sunil istx'ojal. Chiyintanhekanilto eb'naj Komam Jesucristo Jahawil, Komam hanhech'an ijb'alomal jinh. Ha' ton yinh hunteq'an eb'naj tu' tz'ib'nheb'ilkano yul Yum Komam Dios yet payat ta yilal isto-kano eb'naj yinh isya'tajil.

⁵Waxanhka heyohtaxa hune' chiwalti'an yaja' chinnapaxtijan teyet yinh eb'naj Israel, iskonhob' Komam Dios. Lahwi iskolnilo Komam eb'naj yul konhob' Egipto, istanhtzenilo Komam makta mach yayto yul yanma yinh tzet yal Komam. ⁶Yeb'paxo xin, naweti tzet eliko hunteq'an eb'naj ángel mach k'ulo yute isb'a yinh ismunil, isb'ejnikano eb'naj yehob'al aq'b'il tet yu Komam Dios. Wal tinanh xin, k'alan eb'naj sik'leb'il yu ch'en cadena, majan eb'naj xol q'ejholo yu Komam Dios yechman hune' tz'ayik kaw niman yelapnoj, b'ay chul isya'tajil yib'anh eb'naj yu Komam yinh hunelnhe. ⁷Haktik'apax tu' xin anma ay b'ey Sodoma yeb' Gomorra yeb' hunteq'anxa konhob' ayko yinhla ishoyanil, ok eb'naj winaj ixloj, yokpaxo

eb'ix ix winajloj; iswatx'en tzet mach yeto ay isnimanil. Hunteq'an anma tu' ischah isya'tajil xol q'a q'a' yinh hunelnhe. Sunil tu', kankano yechelo tet sunil anma yunhe istxumnilo tzet eliko anma watx'en istx'ojal.

⁸ Waxanhka hak tu' yute Komam Dios, yaq'ni isya'tajil tet hunteq'an anma yet payat tu', yaja' hunteq'an eb'naj ayko texol tinanh, chismanhk'o eb'naj kuyb'anile aykano yu Komam Dios. Yu isyijen eb'naj tzet chal iswayik, chetan eb'naj isnimanil. Chalnipaxo eb'naj tzoti' tx'oj yinh eb'naj ángel. ⁹ Yaj konab'ati yinh naj arcángel Miguel, yet yaq'len howal naj yeb' naj matzwalil yinh isnimanil ya' Moisés, waxanhka kaw aykanh yip naj Miguel tu', yaj machi yal naj tzoti' tx'oj chitz'akti'nhen naj matzwalil tu', kachannhe yal naj haka' ti': «Ha'ojab' Komam Dios chaxhmaynoj,» xhi naj tet naj. ¹⁰ Wal eb'naj chiwalti'an, tonhetik'a chib'uchwa eb'naj yinh hunu tzet ye tu' mach yohtajoj. Lahan isnab'al eb'naj haka' no noq', ha' tzet yohta eb'naj mach chitxumcha yu eb'naj, tonhetik'a chiswatx'e eb'naj tzet choche isk'ul. Ha' hunteq'an tu' chi'etanto yanma eb'naj sata Komam Dios, kat ischahni eb'naj isya'tajil.

¹¹ Kaw k'anch'ankano hunteq'an eb'naj tu', yuto lahan tzet chiswatx'e eb'naj haka' tzet iswatx'e naj Caín. Chiswatx'epaxo eb'naj haka' tzet yute naj Balaam, yu ch'en melyu iswatx'e naj istx'ojal. Chiswatx'epaxo eb'naj haka' iswatx'e naj Coré, kam naj yu mach isyije naj tzet yal Komam Dios; hak tu' xin chu istanhtzelaxilo eb'naj ti' yu ismanhk'omal. ¹² Tx'ixob'al chuko eb'naj texol yet chekutxb'an heb'a wa'o yinh yet Komam. Maxhtik'a nino tzet chal isk'ul eb'naj yet ch'ok eb'naj wa'o texol yeb' machi nino chixiw eb'naj. Lahan eb'naj haka' hunu naj tanhem me', ha'nhe ayko yinh isk'ul istanhen isb'a. Lahanpaxo eb'naj haka' hunu moyan machi nhab' iq'b'il yu, tonhe chi'ek' ijón yu jaq'eq'. Lahanpaxo eb'naj haka' hunu te te' machi satni; kayel tajnajiløj yeb' hok'b'ilkanh yeb' sunil isxe'. ¹³ Lahan eb'naj haka' yet ch'ah poq'la ha' mar kat yanilo ha' ishujuyal, hak tu' chu jilni q'alem ayko xol ha', hak tu' xin chu isyenilo eb'naj tzettaj tx'ixob'al chiswatx'e. Lahanpaxo eb'naj yeb' tx'umel xak'ayto yinh isb'eh, ha' istx'ojal eb'naj tu' chikawxento isto yinh hunelnhe xol q'ejholo; hune' q'ejholo tu' kaw xapalk'onkano isq'ejholohal.

¹⁴ Ya' Enoc, ya' ishuj mame yinta naj Adán, yet payat, tzotel ya' yu yip Komam Dios yinh hunteq'an eb'naj ti': «¡Ab'ewej! Chihul Komam Dios Jahawil yeb' ismilalxa yángel yintaj. ¹⁵ Chul Komam yila' yinh tzet iswatx'e sunil anma, kat yanikaniko isya'tajil yib'anh mak kaw tx'oj chiswatx'e yinh Komam; makta machi Komam yul sat yeb' hanta istx'ojal tzoti' chaliko yinh Komam,» xhi ya' Enoc tu'. ¹⁶ Ha' eb'naj ayko texol tu', aq'omk'ule eb'naj, b'uchwawompaxo eb'naj. Hanhech'an yinh tzet choche isnimanil eb'naj chako isnab'al. Nime winaj chute isb'a istzoteli. Kaw k'ulch'an chutepaxo istzotel eb'naj tet anma, yaja' kab'eb' isnab'al eb'naj. Hak tu' chute eb'naj yunhe k'ul ch'ek' yila' eb'naj.

Hunteq'an kuyb'anile yilal isyijen yuninal Komam Dios

¹⁷Hex xahan ay wuhti'an, tijab' yinh hek'ul yinh tzet halb'il yu eb'ya' ischejab' Komam Jesucristo yet payxa, ¹⁸yet yalni eb'ya' haka' ti': «Hayet toxa chul islahob'al tz'ayik, ay anma chitzeb'i yinh tzet chal Komam Dios, kat iswatx'en istx'ojal choche isk'ul,» xhikano eb'ya'. ¹⁹Ha' hunteq'an eb'naj tu' chi'aniko pohleb'ahil texol. Hanhech'an yinh tzet choche isnimanil eb'naj ayko isnab'al; machipaxo Komam Espíritu Santo yinh yanma eb'naj.

²⁰Yaja' hex kaw xahan ay wuhti'an, linhb'awe heb'a yinh heyamayto yul heyayma yinh Komam, hune' chitit tet Komam Dios. Txahlanhwe yu yip Komam Espíritu Santo. ²¹Hunelnhehojab'nhetik'a heyeko yinh isk'ulch'anil isk'ul Komam Dios. Hak tu' chu heyechman istz'ayikal b'ay chaq' Komam Jesucristo Jahawil hune' koq'inal mach istanhb'al yu isk'ulch'anil isk'ul Komam. ²²Tz'ayojab' hek'ul yinh anma chikab'kon yanma yinh Komam, aq'we meltzoho isnab'al yinh Komam. ²³Yeb'paxo anma haka'tanhe ayxato xol q'a q'a', tzakweltij, hak tu' chu hekolni xol q'a'. Kaw yilal istz'ay hek'ul yinh anma, yaja' nannhehojab' heyu yinh tzet chiswatx'e yuto ay ismay heyetaxto yu. Yahwe hunteq'an istx'ojal chiswatx'e tu', haka' chiyu koyahni hunu xilq'ape b'akb'iliko yal tx'ak yinh.

¡Jaqa'awe tzalaho janma yinh Komam!

²⁴Ha' Komam Dios chu konhisk'ub'ani yunhe machi b'ay chonhlektahi. Aypaxo yip Komam konhyaniko yinh isk'ulch'anil b'ay aya yinh tzalahilal, yuto matxa komul yul sat, yu sajxa je yu Komam. ²⁵¡Hal-laxojab' k'ul-la tzoti' yinh Komam Dios, hune'nhech'an Komam yeb' kaw helan, Kokolomal ye Komam! Jala'wej ta kaw ay yelapno ye Komam, kaw ay yip Komam, yeb' xin sunil tzet aya, ayko yul isq'ab' Komam yet payat, yeb' tinanh, yeb' yinh sunilb'al tiempo. ¡Hakojab' tu'!